



საქართველოს მეცნიერებათა ეროვნული აკადემია

ქართული ენციკლოპედიის ი. აბაშიძის სახელობის მთავარი სამეცნიერო რედაქცია

მორიგე ღმერთი

მორიგე ღმერთი, წესრიგის დამამყარებელი უზენაესი ღმერთი ქართულ მითოლოგიაში, ყოველი ხილულისა და უხილავის დამბადებელი. აღმ. საქართვე. მთიელთა რწმენა-წარმოდგენით, **მ. ღ.** ქვეყნიერებას მართავს არა უშუალოდ, არამედ ღვთისშვილთა შუამავლობით; ხევსბერი შესთხოვს ღვთისშვილებს, რომ გაუწიონ შუამდგომლობა, **მ. ღ.**-ის კარზე აიტანონ საყმოს გასაჭირი. პირველი, ვინც მორიგემ შექმნა შუამდგომლად, არის ბერი ბაადური, იგივე გუდანის წმ. გიორგი. ხალხ. რწმენით, ბერი ბაადური ღვთის ნასახთა შორის პირველ ადგილზე დგას და მორიგეს უშუალო თანაშემწეა. იგი თავად მორიგემ აღჭურვა მხედრულად, სატარებლად თეთრი ცხენი – „ბედის ბედაური“ მისცა და მხოლოდ ამის შემდეგ გამოუშვა ხმელეთზე დევ-კერპებთან საბრძოლველად; შემდეგ მორიგემ თერგვაული გააჩინა, შემდეგ კოპალა, იახსარი, შუბნური, პირქუში და სხვა ხატები. ხალხ. წარმოდგენით, ეს ღვთისშვილები რეალურად არსებული პიროვნებები იყვნენ, რ-ებიც სიცოცხლეში ჩადენილი საგმირო, კეთილი საქმეებისათვის **მ. ღ.**-მა „გაახატა“, თავად მორიგემ შემოართყა ხმალი და დევ-კერპებისაგან, ყოველგვარი მავნე სულისაგან ადამიანთა დაცვა დაავალა. ამ წმინდა მოვალეობას ღვთისშვილები გმირული თავდადებით ასრულებენ. საკულტო ტექსტებში პირველ ადგილზე **მ. ღ.**-ს ახსენებენ და საყმოს მფარველობას და შეწევნას შესთხოვენ.

ლიტ. ბ ა რ დ ა ვ ე ლ ი ძ ე ვ., აღმოსავლეთ საქართველოს მთიანეთის საზოგადოებრივ-საკულტო ძეგლები, ტ. 1, ფშავი, თბ., 1974; კ ი კ ნ ა ძ ე მ., ქართული მითოლოგია, I, ქუთ., 1996; თ რ ი ა უ რ ი ა., ქართული ხალხური დღეობების კალენდარი (ხევსურეთი), თბ., 1988; ჩ ი ქ ო ვ ა ნ ი მ., ბერძნული და ქართული მითოლოგიის საკითხები, თბ., 1971.

გ. ჩინჩალაძე
